

Doc. dr. Lejla Hajdarpašić
Univerzitet u Sarajevu / University of Sarajevo
Filozofski fakultet / Faculty of Philosophy

UDK 016:050(497.6)"1955/2001"(049.3)

**BIBLIOGRAFSKI PROJEKT DRUŠTVA BIBLIOTEKARA
FEDERACIJE BOSNE I HERCEGOVINE¹**

**BIBLIOGRAPHIC PROJECT OF THE LIBRARY ASSOCIATION IN
FEDERATION OF BOSNIA AND HERZEGOVINA²**

Sažetak

*Tekst je prikaz knjige **Bibliografija Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001.** autorica Nadine Grebović-Lendo, Muamere Smajić, Merime Karamović i Alme Felić (Društvo bibliotekara Federacije Bosne i Hercegovine, Sarajevo, 2016, 148 str.).*

Summary

*This text is a review of the book **Bibliography of the Bulletin of Library Association and National library of the People's Republic of Bosnia and Herzegovina and journal Librarianship: 1955-2001.** by Nadina Grebović-Lendo, Muamera Smajić, Merima Karamović and Alma Felić, Sarajevo, Library Association in Federation of Bosnia and Herzegovina, 2016, pp. 148.*

Bibliografija Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001. autorica Nadine Grebović-Lendo, Muamere Smajić, Merime Karamović i Alme Felić ima ukupno 148 kompjuterski ispisanih stranica teksta, a sama bibliografija sadrži

¹ Prikaz knjige **Bibliografija Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001.** Nadine Grebović-Lendo, Muamere Smajić, Merime Karamović i Alme Felić (Društvo bibliotekara Federacije Bosne i Hercegovine, Sarajevo, 2016, 148 str.).

² Review of the book **Bibliography of the Bulletin of Library Association and National library of the People's Republic of Bosnia and Herzegovina and journal Librarianship: 1955-2001.** by Nadina Grebović-Lendo, Muamera Smajić, Merima Karamović and Alma Felić, Sarajevo, Library Association in Federation of Bosnia and Herzegovina, 2016, pp. 148.

reprezentativnih 1685 bibliografskih jedinica prikazanih hronološki, u abecednom redoslijedu navođenja.

Bibliografija Biltena Društva bibliotekara i Narodne biblioteke NR BiH i časopisa Bibliotekarstvo: 1995–2001. rađena je, *de visu*, korištenjem ProCite alata za izradu bibliografija, unutar kojeg su autorice modificirale ponuđenu *Journal Article* ulaznu masku za unos podataka, ali i izlazni bibliografski stil. Tokom bibliografske obrade odnosno u oblikovanju bibliografskih jedinica autorice su uvažile i dosljedno primijenile sve bibliografske zakonitosti, to jest usvojile sve relevantne međunarodne smjernice za izradu bibliografija.

Bibliografiju Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001. prati *Autorski registar*, uvodne napomene o *Biltenu Društva bibliotekara i Narodne biblioteke NR BiH i časopisu Bibliotekarstvo* te *Napomene uz bibliografiju* koje, ukazujući na značaj ovoj bibliografskog projekta, donose i jasne upute o strukturi te korištenju bibliografije.

Kao poseban izazov ovoga bibliografskog poduhvata autorice, u *Napomenama*, izdvajaju izradu *Autorskog registra* odnosno problematiku razrješavanja brojnih na građi prisutnih oblika imena i prezimena autora te prisustva velikog broja inicijala. Konsultirajući dostupne stampane i elektronske izvore, a posebno se pritom referirajući na radove autora Slavka Šimića i Mahmuda Traljića, autorice su, u mjeri u kojoj je to bilo moguće, a posebno zahvaljujući i susretljivosti „živih izvora“, uspjele razriješiti pojedine inicijale odnosno utvrditi prave oblike imena i prezimena autora priloga.

Pored evidentnog poštivanja svih bibliografskih načela te pokušaja utvrđivanja pravih oblika imena i prezimena autora, ova bibliografija ima posebnu vrijednost budući da je njen predmet *Bilten Društva bibliotekara i Narodne biblioteke NR BiH*, koji je 1960. godine preimenovan u časopis *Bibliotekarstvo*.

Riječ je o časopisu koji ima poseban značaj ne samo za bosanskohercegovačku akademsku i stručnu bibliotečku zajednicu već i bibliotečke zajednice u regionu, te se izradom ove dugo nedostajuće bibliografije *Biltena Društva bibliotekara i Narodne biblioteke NR BiH* odnosno *Bibliotekarstva* zapravo neupitno pomogla kako prezentacija tako i reprezentacija razvoja prakse i teorije bibliotečkih i informacijskih nauka na našim prostorima.

Prvi broj *Biltena Društva bibliotekara i Narodne biblioteke NR BiH* objavljen je davne 1955. godine, a nastao je kao zajednički izdavački projekt Društva bibliotekara Narodne Republike Bosne i Hercegovine i Narodne biblioteke Narodne Republike Bosne i Hercegovine, s ciljem da služi kao platforma za uvezivanje bibliotekara, razmjenu iskustava, prikupljanje statističkih i drugih podataka u vezi sa bibliotečkom infrastrukturom Narodne Republike Bosne i Hercegovine. *Bilten Društva bibliotekara i Narodne biblioteke NR BiH* karakterizirala je redovitost izlaženja, jednom mjesečno (osim u julu i augustu), sve do 1960. godine kada je *Bilten Društva bibliotekara i Narodne biblioteke NR BiH* preimenovan u časopis *Bibliotekarstvo*, koji pak nastavlja izlaziti tromjesečno, u okviru Društva bibliotekara Bosne i Hercegovine, a donoseći pritom brojne novine u kontekstu grafičkog izgleda i tematskih cjelina časopisa tokom 70-ih i 80-ih godina prošlog stoljeća.

Redovitost izlaženja *Bibliotekarstva* je prekinuta u ratnom periodu, 1992–1995, a njegov posljednji broj je objavljen 2002. godine.

Izradom *Bibliografije Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001*. omogućio se cjelovit, pouzdan bibliografski uvid u pravilnike, zakone, standarde koji su uređivali oblast bibliotekarstva na našim prostorima ali i materijale sa brojnih skupština i savjetovanja Društva bibliotekara Bosne i Hercegovine, seminare, informacije o izdanjima izdavačkih kuća, preglede i anotacije odabranih članaka iz oblasti bibliotekarstva, te različite statističke analize, osvrte, znanstvene i stručne članke i brojne druge priloge *Biltena Društva bibliotekara i Narodne biblioteke NR BiH*, kasnije *Bibliotekarstva*, s prekidima u njegovu objavljivanju, te do njegovog konačnog i nezasluzenog gašenja 2002. godine.

Spomenuti brojni i raznovrsni prilozi, tj. različiti zapisi u vezi sa bibliotečkim i informacijskim naukama na našim prostorima – zabilježeni u *Biltenu Društva bibliotekara i Narodne biblioteke NR BiH* i *Bibliotekarstvu*, a koji su, uz navedene prekide u objavljivanju, nastajali u vremenskom okviru od skoro pola stoljeća – konačno su, zahvaljujući ovom bibliografskom projektu, okupljeni na jednom mjestu.

Bibliografiju Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001. otuda treba prepoznati ne samo kao napor Društva bibliotekara Federacije Bosne i Hercegovine usmjeren ka osmišljavanju i realizaciji značajnih, a nedostajućih bibliografskih projekata, veći kao temelj za predstojeće neophodne bibliografske aktivnosti ali i

izdavačke inicijative Društva bibliotekara FBiH koje bi se možda mogle usmjeriti upravo u pravcu pokretanja znanstvenog časopisa u oblasti bibliotečkih i informacijskih nauka kao organa Društva bibliotekara FBiH.

Posebno u vezi sa *Bibliografijom Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001.* raduje učešće studentica Odsjeka za komparativnu književnost i bibliotekarstvo Filozofskog fakulteta Univerziteta u Sarajevu u bibliografskoj obradi *Biltena Društva bibliotekara i Narodne biblioteke NR BiH i Bibliotekarstva*, te je očekivati da će Društvo bibliotekara FBiH i u nadolazećem periodu njegovati angažman studentica i studenata Odsjeka za komparativnu književnost i bibliotekarstvo Filozofskog fakulteta Univerziteta u Sarajevu u ovakvim i sličnim projektima.

U kontekstu prethodno spomenutog, *Bibliografiju Biltena Društva bibliotekara i Narodne biblioteke NR BiH i časopisa Bibliotekarstvo: 1955–2001.* treba prepoznati kao izuzetno korisno bibliografsko štivo za istraživanje razvoja prakse i teorije bibliotečkih i informacijskih nauka na našim prostorima od sredine do kraja 20. stoljeća.